

Date – 03/12/2024

Time - 18:30 -18:40Hrs

- Chief Minister Pu Lalduhoma'n pianphunga rualbanlote chu Theihna danglam bik nei an ni a, hmasawna mil zela an theihna hai chhuahpui chu mi tin mawhphurhna a ni a ti.
- Home Minister Pu K Sapdangan State Handloom Expo Kolasib-ah a hmang.
- Parliament in hnih rorel inkhawm chu ni nga chung rorel thei loa a awm hnuin vawiinah chuan tha taka rorel inkhawm neih a ni.
- 4 Prime Minister Narendra Modia chuan vawiin criminal law thar pathum hlawhtling taka hman a ni chu ramchung mipuite hlawhtlinna a ni a ti.



WORLD DISABLED DAY

Chief Minister Pu Lalduhoma'n pianphunga rualbanlote chu Theihna danglam bik nei an ni a ti a, hmasawna mil zela an theihna hai chhuahpui chu mi tin mawhphurhna a ni a ti.

Khawvel puma Rualbanlote ni (International Day for Persons With Disability) 2024 puala a social media facebook account kaltlanga Rualbanlote Ni chibai a bukna ah he thu hi sawiin Chief Minister chuan mitin te mahni theihna zawn theuhah rualbanlote theihna hai chhuahpui tur leh huapzo leh awmze nei zawka tanpui turin a sawm a, Sawrkar chuan zirna in tam takah Rualbanlo naupangte tana chet awlsam zawkna tur hmanrua a siam a, special educator te pawh mumal leh awmze nei zawka hman tangkai dan a dap mek tih sawiin an tana hmalak theihna awm apiangah hma a la zel dawn tih a sawi.

Chief Minister chuan rualbanlote chu Mizoram sawrkarin a thlahthlam dawnlo tih sawiin theihtawpin a tanpui zel dawn a ti bawk.

Rualbanlote Ni pual hian vawiin khan Mizoram hmun hrang hrangah hun hman a ni a, Aizawl ah chuan Directorate of Social Welfare and Tribal Affairs, Federation of Mizoram Disabled Organisation (FMDO), National Institute for Locomotor Disabilities, Regional Centre Aizawl tangkawp buatsaihin World Disabled Day hi Zarkawt Recreation Centre ah hman niin SW&TA Minister Pi Lalrinpuii'n a hman pui a,

Pi Lalrinpuii chuan Tunhma lamin rualbanlote chu chhawnehaih leh nuihza siam nan te hman an ni thin a, an dikna leh chanvo ngaihsak an nih ngaihloh thu sawiin tun hnuah erawh Mizoram sorkar in chak taka hmala in Person with Disability wing hnuaiyah Commissioner neiin rualbanlote hamthatna tur ngaituahin hma nasa takin lak a ni a ti a. Mizoram sorkar hnuaiyah hnalak ah pawh rualbanlote tan seat hauh anih tawh thu sawiin pianphunga rualbanlote pawn sorkar hna an thawk thei tawh chu hmasawna ropui tak a ni a ti.

Pi Lalrinpuii chuan rualbanlote chu an rualbanlohna te chhuanlama hmang lovin, an mahni fuih kalto leh ti chaktu a hmanga hmasawn tum tlat zel turin a chah bawk.



PRESIDENT

President Draupadi Murmu-i chuan National Award for the Empowerment of Persons with Disabilities mi 33 hnenah a hlan. Vawiin International Day of Persons with Disabilities 2024 puala New Delhi-a inkhawm buatsaihah he chawimawina hi sem a ni a. President Murmu-i chuan vawiina chawimawina dawngtute chu khawtlanga rualbanlote chhawmdawl kawngah mi entawntlak an nih thu a sawi a. Anamahni avang hian mimal leh pawl ang pawhin rualbanloten ngaih pawimawh an hlawh dawn a ni a ti bawk.



MIZORAM STATE POLICY COORDINATION COMT

Mizoram State Policy Coordination Committee chuan Bana Kaih Scheme hnuai Implementing Department atangin Nodal officer-te telin, Progress Partner thlanchhuahna kawnga sawt zawk a hmalak dan tur vawiin khan Aizawlah an sawi ho a.

MPCC Vice Chairman Pu KC Lalmalsawmzauva, Adviser to Chief Minister (Implementation of Hand Holding Policy), chuan hun kaihruiin Mizoram tihhmasawna tura thiamna leh theihna nei, thawhpui tur, Progress Partner thlanchhuahna kawng a Nodal Officer-te hmalakna leh inpekna a lawmawm hle a ni a ti a. Ram tan a hmasawna thlen thei tur a theihna nei, mi hlawhtling ngei tur thlan chhuah hna chu phur tak leh uluk tak si a thawk zel turin a ngen bawk a ni.

Thutkhawmnaah hian Progress Partner thlan chhuah kawnga Nodal Officer-te pui thei tur, Assessment Sheet duan thar chu a hman dan tur en ho a ni a. Progress Partners-te dilna mil a loan ruahman theih, Commerce & Industries, Animal husbandry & Veterinary Department, Agriculture & Farmers Welfare Department, Fisheries leh Horticulture Department hnuai a Scheme hrang hrang awmte zir ho a ni a. State Bank of India, Mizoram Rural Bank leh Mizoram Cooperative Apex Bank hnuai a loan scheme hrang hrang tarlanna hun hman niin Credit Guarantee Fund Trust for Micro & Small Enterprises leh Mizoram Credit Guarantee Scheme chungchang zir hona neih a ni bawk.



HANDLOOM EXPO

Mizoram Handloom and Handicrafts Development Corporation Limited (ZOHANDCO) leh sorkar laipua Ministry of Textiles Development Commissioner for Handloom te tangkawpin “State Handloom Expo” Kolasib-a an buatsaih chu Pu K. Sapdanga, Home Minister chuan a hawng.

Home Minister Pu K Sapdanga chuan, ZOHANCO leh Public Sector Undertaking dangte chu sum thawk chhuak a, Revenue nei teuh teuh tura beisei an nih loh thu a sawi a, PSU ten an tum ber chu Mizo mipuiten a kut themthiamna hmanga ei an zawn theihna tur kawng kawhhmuh a nih thu a sawi a. An hna hi a pawimawh hle a ni a ti.

Sorkar hmasa ten PSU te tangkai tawk lova hria in an lo tih tawp tawh chu Thalaite leh Kut themthiamna neiten an hman tangkai turin, inrenchem kumah puang chungin sorkar thar chuan a ti nung thar leh tih a sawi a. PSU kaihthawh leh hi Employment Generation nan a tih a ni lo a, Self Employment a lo pun theih nan mipuite ban phak tura zirlai chhawpchuaktu tur te an ni a ti.

Home Minister chuan, sorkar hna awm chu lehkhathiam ten an indaih em em a. Police Constable 200 lak tur a awm tih thawm avangin tun atanga lo in buatsaih thalai rual zingah MA/BA pass an tam em em a. Hei hian sorkar a hna hmuh a harsat zia a tilang tih sawiin, kum tin BA pass chhuak thar hi sang tel an awm lain sorkar hna erawh a tlem em em tih sawiin, hna hi a zawn a zawn chi a ni lo a, a siam a siam chi a ni, a ti. Hlawhtlinna hi BA/MA nih ah a in nghat lo a, rinawmna leh taihmakna ah a in nghat, tih sawiin, hei hi ZOHANCO in a tum pakhat chu a ni tih a sawi.

Pu Lalhmunsiam, Managing Director, ZOHANCO chuan ZOHANCO hmalakna a tarlang a, tuna Handloom Expo an neihah hian Stall 60 hawn a nih thu sawiin, Mizoram hmun hrang hrang atangin Puan tahtuten an puan tah te an zuar chhuak a, Expo hi kar leh nilaini thleng an kalpui dawn a ni.

<><><>

CHRISTMAS PREPARATION

Commerce and Industries Department hnuai Aizawl New Market Management staff te chuan Krismas bazar lo awm turah kum dang zawng aia an inbuatsaih nasat thu an sawi.

Akashvani Correspondent zawhna chhangin Pu Vanlalsawma, Asst. Marketing Inspector chuan Krismas lo thleng tur atan thawktute nasa taka an inbuatsaih thu sawiin, kum dang zawng aia pawisa bo pawh tlem turin bazar beat post leh police te'n hma an lak thu a sawi bawk.

Pu Vanlalsawma chuan bazar hmun zat ve lai thiah leh sak that a nih avangin kalkawng te a zau tawk loa, smart city project hnuai Lushai engineer ten building an sak kalkawngte pawh sumdawngte ngenna avangin krismas bazar neih chung hian a leta tizau tura hmalak a nih thu a sawi a. Department in CCTV 8 a pek chu bazar chung hmun hrang hrangah vuah a ni dawn tih sawiin hei hian kum dang zawng aia pawisa bo leh rukruk lama an harsatna tawh thinte nasa taka a puih an beisei thu a sawi.

Tun dinhmunah Aizawl New Market ah hian seat pangngai a thu 86 awmin seat thiahsak/phallohna a thu 90 bawr vel an awm a ni.

<><><>

RD MINISTER

Rural Development changtu Minister Prof.Lalnilawman, Sawrkar laipui leh state sawrkar chuan thingtlang mite hmasawmna turin scheme tha tak tak a kalpui thin tih sawiin kum 2011 Chhiarpui behchhana mi harsa zawkte In sak tanpuina PMAY(G) kalpui mek chu, in leh lo la nei lo, tanpuina mamawh tak tak te thlan chhuah an nih theih nan siam rem tum mek a ni a ti a, Border Area Development Programme (BADP) chu Vibrant Village Programme (VVP) a thlak a, thiamthil tihpun lam te pawh telh chhoh tum a ni a ti bawk.

Vawiin-a Khawbung RD Block in a din champhaphak kum 25-na, Silver Jubilee a tlin lawmna, BDO Multipurpose Hall-ah an lawmna ah he thu hi sawiin Prof. Lalnilawma chuan Kum 2000 atangin Rural Development kaihnawih hna hrang hrang a lo thawh tawh thin thu sawiin, Khawbung RD Block-in kum 25 a lo tlin takah chuan, scheme kalpui tawh te leh scheme kal mek te thlir chungin kan dinhmun leh kan hmabak engtin nge kan kalpui ang tih kan inzawh thar fo a tul a ni, a ti.

Khawbung RD Block hi East Lungdar RD Block hnuai ah kum 1995 June ni 20 khan Additional Block-ah hlankai a ni a. Kum 1999, November ni 26 khan Block puitlingah hlankai niin, vawiin thleng hian Addl Block Development Officer (BDO)

2 leh BDO 16 an awm tawh a ni. Khawbung RD Block hnuaiah hian khaw 25 an awm mek a, BDO hovin Staff 44 ten an enkawl mek a ni.

<><><>

AIR ON SOCIAL MEDIA

Chanchin thar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

<><><>

PARLIAMENT

Parliament in hnih rorel inkhawm chu ni nga chung rorel thei loa a awm hnuin vawiinah chuan tha taka rorel inkhawm neih a ni.

Lok Sabha leh Rajya Sabha-ah te hian Question Hour leh Zero Hour chungin thil pawimawh tak tak sawiho a ni a.

Lok Sabha inkhawmah chuan atir lamah opposition te hun reilote lungawiloin an chhuak tau a. Oppostion-te hian Uttar Pradesh-a Sambhal district-a tharum thawhna thleng leh sumdawng pawl pakhat hlemhletna an duhloh zia an lantir a ni. Speaker Om Birla chuan an sawiduhte Zero Hour-a sawichhuak turin a ngen a ni. Samajwadi party hruaitu Akhilesh Yadav chuan Sambhal-a thilthleng chu ruahmanna mumal tak nena thleng anih thu Zero Hour ah hian a sawi a. He pawikhawihnaa inrawlh police leh sawrkar hnathawkte chu hrem ngei an phut thu a sawi a ni.

Rajya Sabha-ah pawh Samajwadi Party hruaitu Prof. Ram Gopal Yadav chuan Sambhal thilthlengah State Police te an inrawlh niin a puh a. He pawikhaiwhnaah hian mi panga an thih thu leh midang 20 in hliam an tawrh thu a sawi a ni.

<><><>

PM ON NEW CRIMINAL LAW

Prime Minister Narendra Modia chuan vawiin criminal law thar pathum hlawhtling taka hman a ni chu ramchung mipuite hlawhtlinna a ni a ti. Vawiin khan dan thar pathumte thlirletna hun Chandigarh-a a hmanpuinaah he thu hi sawiin Pu Modia chuan criminal law pathum chu ram danpuin mipuite tana a thiltum tihlawhtlinna tura ke penna pawimawh tak a ni a ti bawk.

He hunah hian Union Home Minister Amit Shah leh Haryana Chief Minister Nayab Singh Saini bakah sawrkar mi pawimawhte an tel a ni.

<><><>